

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI KHAMIS, 18 JUN 2009, PUKUL 10.00 PAGI**

Bil. 26

---

**PERTANYAAN-PERTANYAAN BAGI JAWAB LISAN**

1. PR-022-L18848  
**Dato' Dr. Mohamad Shahrum bin Osman [ Lipis ]** minta **MENTERI PELAJARAN** menyatakan adakah Kerajaan bercadang merombak semula kegiatan ko-kurikulum di sekolah bagi membolehkan usaha melahirkan generasi muda berilmu, berkemahiran dan cergas.
2. PR-022-L20126  
**Dr. Tan Seng Giaw [ Kepong ]** minta **MENTERI SUMBER ASLI DAN ALAM SEKITAR** menyatakan keadaan yang sebenar mengenai hutan di semua negeri yang berkenaan termasuk keluasan hutan yang masih kekal. Setakat mana hutan asli dapat dipelihara dan keluasan yang telah musnah di semua negeri kerana pembalakan yang merupakan pengkhianatan.
3. PR-022-L18828  
**Dato' Haji Ismail Bin Haji Abd. Muttalib [ Maran ]** minta **MENTERI PENERANGAN, KOMUNIKASI DAN KEBUDAYAAN** menyatakan di akhir-akhir ini semakin banyak media-media cetak dan elektronik yang menyebarkan berita-berita fitnah, hasutan dan yang boleh memecah belahkan perpaduan masyarakat termasuk melibatkan parti-parti politik. Berapa dan apakah bentuk-bentuk tindakan yang telah diambil terhadap pengendali media-media tersebut sepanjang tahun 2000 hingga 2008 serta tindakan keras Kerajaan di masa depan.
4. PR-022-L19052  
**Tuan Haji Nasharudin bin Mat Isa [ Bachok ]** minta **MENTERI KEMAJUAN LUAR BANDAR DAN WILAYAH** menyatakan impak projek MID di kawasan luar bandar.

5. PR-022-L19715  
**Datuk Sapawi bin Haji Ahmad [ Sipitang ]** minta **MENTERI BELIA DAN SUKAN** menyatakan usaha, konsep, dan pendekatan yang dilaksanakan untuk menyemaikan semangat kekitaan di kalangan generasi muda bagi mencapai matlamat gagasan 1 Malaysia yang diperkenalkan oleh YAB. Perdana Menteri.
6. PR-022-L19076  
**Tuan Jeff Ooi Chuan Aun [ Jelutong ]** minta **MENTERI KEWANGAN** menyatakan sama ada dengan tertubuhnya SME Credit Bureau (M) Sdn. Bhd. menerusi Credit Guarantee Corp. (M) Bhd. (GGC) milikan Bank Negara Malaysia telah berjaya membantu Usahawan-usahawan Kecil-Sederhana mencapai kemudahan dana secara lebih terus dan telus.
7. PR-022-L19105  
**Puan Hajah Nancy binti Haji Shukri [ Batang Sadong ]** minta **MENTERI DALAM NEGERI** menyatakan apakah kriteria yang diperlukan oleh sesebuah kawasan untuk mempunyai sebuah balai polis.
8. PR-022-L20178  
**Tuan Salahuddin Bin Haji Ayub [ Kubang Kerian ]** minta **MENTERI PELAJARAN** menyatakan apakah pihak Kerajaan akan mengkaji secara holistik terhadap keberkesanan sistem peperiksaan yang dilaksanakan di sekolah-sekolah di negara ini.
9. PR-022-L18985  
**Tuan Raime Bin Unggi [ Tenom ]** minta **MENTERI PERDAGANGAN ANTARABANGSA DAN INDUSTRI** menyatakan sejauh manakah jaminan Kerajaan untuk menjana peluang pekerjaan terutama bagi rakyat tempatan apabila Kerajaan memutuskan untuk meliberalisasikan 27 sub-sektor perkhidmatan seperti pelancongan, pengangkutan, kesihatan dan perniagaan.
10. PR-022-L19969  
**Dr. Che Rosli bin Che Mat [ Hulu Langat ]** minta **MENTERI PERTANIAN DAN INDUSTRI ASAS TANI** menyatakan adakah Kementerian sudah mengkomersialkan R&D tanaman 'styvia' yang dijalankan oleh MARDI sebagai alternatif pengeluaran gula. Sejauh manakah kejayaan yang dicapai dalam pemasaran gula alternatif ini bagi membantu menjaga kesihatan rakyat.
11. PR-022-L19774  
**Dato' Henry Sum Agong [ Lawas ]** minta **MENTERI KEMAJUAN LUAR BANDAR DAN WILAYAH** menyatakan bilakah pemasangan lampu jalan kampung yang dihentikan sekian lama akan dijalankan semula.

12. PR-022-L19020  
**Tuan Haji Ab Aziz bin Ab Kadir [ Ketereh ]** minta **MENTERI KEWANGAN** menyatakan mengapakah formula pengiraan duti setem penyerahhakan (duti ad valorem) yang dikenakan terhadap surat cara 'Deed of Assignment' membebaskan kontraktor kecil yang menjadi sub-kontraktor kepada kontraktor utama.
13. PR-022-L18835  
**Dato' Mohd Jidin bin Shafee [ Setiu ]** minta **MENTERI PERTANIAN DAN INDUSTRI ASAS TANI** menyatakan mengenai status projek ternakan ikan sangkar berimpak tinggi di Tasek Kenyir yang kini dikatakan telah diabaikan sehingga ia membawa kesan kepada pengusaha apatah lagi dengan krisis ekonomi yang kian meruncing.
14. PR-022-L19579  
**Dr. Haji Dzulkefly bin Ahmad [ Kuala Selangor ]** minta **MENTERI PENERANGAN, KOMUNIKASI DAN KEBUDAYAAN** menyatakan kepada dewan pada kedudukan berapakah Malaysia diletakkan dalam kajian 150 negara, yang dilakukan oleh Kesatuan Telekomunikasi Antarabangsa (ITU), tentang kos membuat panggilan telefon atau melayari Internet nisbah pendapatan purata bulanan, dan apakah sebab-sebab utama yang menyebabkan kedudukan negara pada tangga tersebut.
15. PR-022-L19255  
**Datuk Tiong Thai King [ Lanang ]** minta **MENTERI KESIHATAN** menyatakan bilangan pesakit buah pinggang yang menjalani rawatan dialisis di hospital Kerajaan, swasta dan pusat NGO pada tahun 2008.
16. PR-022-L18538  
**Dato' Johari bin Abdul [ Sungai Petani ]** minta **MENTERI KEWANGAN** menyatakan :-
- (a) laporan Ketua Audit Negara yang ditandatangani pada 23 Jun 2008 menyebut, hasil analisis terhadap prestasi kewangan bagi 38 Syarikat Kerajaan, didapati 16 syarikat mengalami kerugian berjumlah keseluruhannya RM0.91 bilion. Senaraikan nama-nama syarikat yang mengalami kerugian dan nyatakan nama-nama Ketua Pegawai Eksekutif syarikat tersebut; dan
  - (b) apakah usaha-usaha yang konkrit yang telah dan sedang dijalankan agar syarikat-syarikat yang mengalami kerugian ini tidak terus rugi dan berhutang dengan institusi kewangan.

17. PR-022-L18726  
**Datuk Seri Panglima Mojilip bin Bumburing @ Wilfred [ Tuaran ]** minta **MENTERI LUAR NEGERI** menyatakan sama ada Kerajaan, atas konsep 1 Malaysia, berhasrat melantik duta dan pesuruhjaya dari Sabah.
18. PR-022-L19447  
**Dato' Haji Ab. Halim Bin Ab. Rahman [ Pengkalan Chepa ]** minta **PERDANA MENTERI** menyatakan di antara projek yang dirancang dalam koridor ECER dan NCER adalah penanaman sayur-sayuran dan buah-buahan secara besar-besaran untuk tujuan penggunaan domestik dan import. Apakah langkah-langkah persiapan dari segi logistik untuk menyempurnakan kedua-dua tujuan tersebut.
19. PR-022-L18405  
**Datuk Wira Ahmad bin Haji Hamzah [ Jasin ]** minta **MENTERI KEWANGAN** menyatakan mengenai prosedur urusan tender Kerajaan.
20. PR-022-L19890  
**Puan Teresa Kok Suh Sim [ Seputeh ]** minta **MENTERI DALAM NEGERI** menyatakan nama bekas anggota Komunis yang dibenarkan balik ke Malaysia dan nama yang ditolak untuk pulang ke Malaysia. Nyatakan kriteria yang ditetapkan oleh pihak Kementerian untuk membenarkan dan menolak bekas anggota Komunis untuk pulang ke Malaysia.
21. PR-022-L18634  
**Tuan Ding Kuong Hiing [ Sarikei ]** minta **MENTERI PELAJARAN** menyatakan adakah pihak Kementerian bercadang menaik taraf Institut Rejang, Meradong ke taraf universiti sejajar dengan keperluan dan sebagai langkah mengatasi masalah profesion guru di Malaysia Timur. Jika tidak, nyatakan kenapa.
22. PR-022-L20020  
**Tuan Mohd Yusmadi bin Mohd Yusoff [ Balik Pulau ]** minta **MENTERI LUAR NEGERI** menyatakan status tahanan rakyat Malaysia di Teluk Guantanamo (Guantanamo Bay) apabila Kerajaan Amerika Syarikat membuat keputusan untuk menutup pusat tahanan tersebut.
23. PR-022-L19284  
**Datuk Richard Riot anak Jaem [ Serian ]** minta **MENTERI PELAJARAN** menyatakan apakah yang terjadi dengan rancangan Kerajaan untuk menubuhkan sebuah sekolah rendah baru di kawasan Tong Nibong, Serian, yang telah diluluskan beberapa tahun yang lalu.

24. PR-022-L19585  
**Tuan Mohd Firdaus bin Jaafar [ Jerai ]** minta **MENTERI PERTANIAN DAN INDUSTRI ASAS TANI** menyatakan jumlah peruntukan dan langkah-langkah yang diambil oleh Kementerian bagi menjayakan projek peningkatan hasil tanaman padi kepada petani-petani di kawasan MADA bagi tempoh 2008 dan 2009.
25. PR-022-L19899  
**Tuan Chua Tee Yong [ Labis ]** minta **MENTERI PELAJARAN** menyatakan jumlah bantuan kewangan yang telah dipohon dan diberi kepada sekolah-sekolah bantuan Kerajaan seperti Sekolah Jenis Kebangsaan Tamil, Sekolah Jenis Kebangsaan Cina, Sekolah Mubaligh dan Sekolah Agama sejak tahun 2004 dan kemukakan jumlah-jumlah bantuan yang telah disalurkan mengikut negeri.
26. PR-022-L19146  
**Tan Sri Dato' Abd. Khalid bin Ibrahim [ Bandar Tun Razak ]** minta **MENTERI PENGANGKUTAN** menyatakan :-
- (a) berikutan Projek Terminal Pengangkutan Integrasi Bandar Tasik Selatan yang dijangka siap pada akhir tahun hadapan yang akan menggantikan Hentian Puduraya, Perhentian Pudu dan Perhentian Pekeliling, adakah Kerajaan Pusat telah membuat kajian secukupnya sebelum membuat keputusan untuk memindahkan tiga perhentian bas di Terminal Bandar Tasik Selatan yang pada asalnya hanya untuk menggantikan Terminal Puduraya; dan
  - (b) apakah langkah-langkah yang dilakukan untuk menjamin keadaan trafik di Bandar Tasik Selatan tidak terjejas oleh projek berkenaan.
27. PR-022-L19120  
**Tuan Matulidi bin Jusoh [ Dungun ]** minta **MENTERI KEMAJUAN LUAR BANDAR DAN WILAYAH** menyatakan berapa jumlah kampung yang dikategorikan sebagai 'Gred A' dan setakat manakah program Gerakan Daya Wawasan (GDW) telah berjaya membangun kampung tradisi di luar bandar.

28. PR-022-L18452  
**Datuk Chua Soon Bui [ Tawau ]** minta **MENTERI DALAM NEGERI** menyatakan :-
- (a) apakah keputusan penyiasatan terhadap suatu kumpulan 12 orang (semua mempunyai kad pengenalan Malaysia) yang diketuai oleh seorang Suluk yang mendakwa sebagai keturunan Kesultanan Sulu, yang membakar 6 bendera negeri Sabah dan Malaysia di Lahad Datu pada 4 April 2009; dan
  - (b) apakah pembakaran bendera Sabah atau Malaysia merupakan suatu jenayah dan sudahkah mereka itu diheret ke mahkamah.
29. PR-022-L19646  
**Tuan Mohd Nizar bin Zakaria [ Parit ]** minta **MENTERI PELAJARAN** menyatakan adakah setiap kejayaan cemerlang pelajar miskin dan yatim piatu dibukukan sebagai langkah pro-aktif dijadikan anjakan motivasi kepada pelajar lain untuk cemerlang dalam pembelajaran masing-masing.
30. PR-022-L18672  
**Datuk Eric Enchin Majimbun [ Sepanggar ]** minta **PERDANA MENTERI** menyatakan jumlah peruntukan khas yang diberi kepada Ahli-ahli Parlimen pada setiap tahun sejak 2004-2009 dan sama ada terdapat perbezaan peruntukan diluluskan kepada negeri-negeri Semenanjung, Sabah dan Sarawak.
31. PR-022-L18412  
**Tuan Saifuddin Nasution bin Ismail [ Machang ]** minta **PERDANA MENTERI** menyatakan apakah status terkini dan tahap kemajuan Projek Jambatan Kedua Pulau Pinang dan berapakah jumlah bayaran yang telah dibayar kepada kontraktor projek tersebut setakat ini.
32. PR-022-L19375  
**Tuan Sim Tong Him [ Kota Melaka ]** minta **MENTERI PELAJARAN** menyatakan bilangan kelulusan pembinaan Sekolah Jenis Kebangsaan Cina dan Sekolah Jenis Kebangsaan Tamil yang baru untuk RMK-9 dan nyatakan lokasinya dan anggaran kos pembinaan.
33. PR-022-L18997  
**Tuan Chow Kon Yeow [ Tanjong ]** minta **MENTERI PERUMAHAN DAN KERAJAAN TEMPATAN** menyatakan apakah langkah-langkah pihak Persekutuan untuk meningkatkan prestasi-prestasi PBT selepas proses 'star rating' yang diadakan.

34. PR-022-L18685  
**Datuk Juslie Bin Ajirol [ Libaran ]** minta **MENTERI LUAR NEGERI** menyatakan polisi-polisi terbaru dalam memperkasakan dasar luar Malaysia, terutama sekali peranan negara di Pertubuhan Bangsa-Bangsa Bersatu (PBB).
35. PR-022-L18996  
**Tuan Chow Kon Yeow [ Tanjong ]** minta **PERDANA MENTERI** menyatakan berikutan tindakan Kerajaan untuk menubuhkan Suruhanjaya Pengangkutan Awam Darat (SPAD), apakah pencapaian setakat ini dan bila dapat diselaraskan di peringkat Kerajaan Negeri.
36. PR-022-L19453  
**Dato' Shahrir Bin Ab. Samad [ Johor Bahru ]** minta **PERDANA MENTERI** menyatakan mengapakah pengurusan Johor Bahru Sentral menekankan kepada pulangan kadar komersial sedangkan pendekatan ini akan meminggirkan sebilangan besar peniaga-peniaga kecil yang sudah lama berniaga di kawasan CIQ yang lama serta tidak bersesuaian dengan tahap pendapatan golongan yang menggunakan kemudahan itu.
37. PR-022-L18481  
**Dato' Seri Tiong King Sing [ Bintulu ]** minta **MENTERI DALAM NEGERI** menyatakan :-
- (a) sejauh manakah pihak Kementerian mengambil tindakan dalam menangani masalah permohonan sijil kelahiran untuk anak-anak angkat di negeri Sarawak; dan
  - (b) adakah pihak Kerajaan berhasrat untuk membuat penyelarasan dengan penggunaan satu sistem yang sama di Semenanjung, Sabah dan Sarawak dalam pengeluaran gantian sijil kelahiran khas untuk anak-anak angkat.
38. PR-022-L20129  
**Tuan Lim Guan Eng [ Bagan ]** minta **PERDANA MENTERI** menyatakan harga semeter persegi yang dibayar PERDA kepada Kerajaan negeri Pulau Pinang untuk tanah bandar PERDA dan berapa harga semeter persegi tanah itu dijual kepada Aseania Development Sdn. Bhd. Berapa lot dan keluasan tanah tersebut.

39. PR-022-L19988  
**Puan Norah binti Abd Rahman [ Tanjong Manis ]** minta **MENTERI KEWANGAN** menyatakan ;-
- (a) bilakah Kerajaan akan meningkatkan jaminan wang simpanan di institusi kewangan tempatan yang kini terhad kepada RM60,000 sahaja oleh Perbadanan Insurans Deposit Malaysia kepada jaminan 100 peratus wang deposit sebenar; dan
  - (b) sekiranya tidak, apakah sebab-sebabnya.
40. PR-022-L19745  
**Tuan Karpal Singh [ Bukit Gelugor ]** minta **PERDANA MENTERI** menyatakan bilakah Kerajaan bercadang untuk memansuhkan Dasar Ekonomi Baru sepertimana dicadangkan oleh YAB. Perdana Menteri secara umum kebelakangan ini di Singapura.
41. PR-022-L18475  
**Datuk Seri Dr. Fong Chan Onn [ Alor Gajah ]** minta **MENTERI PERUMAHAN DAN KERAJAAN TEMPATAN** menyatakan berapa jumlah pemaju rumah yang telah mengamalkan konsep 'bina dan jual'. Adakah Kementerian bercadang untuk memastikan semua pemaju akan mengamalkan konsep ini untuk melindungi hak pembeli-pembeli rumah.
42. PR-022-L18870  
**Tuan Manogaran a/l Marimuthu [ Telok Intan ]** minta **MENTERI DALAM NEGERI** menyatakan :-
- (a) apakah kriteria seorang Pegawai Polis Kanan untuk dilantik menjawat jawatan Pegawai Kanan Polis Diraja Malaysia seperti Ketua Polis Daerah (OCPD) dan ke atas; dan
  - (b) adakah pegawai-pegawai kanan ini diberi latihan dalam semua aspek seperti undang-undang, hak asasi manusia, perhubungan awam, etika dan sopan santun supaya tepat kepada slogan Cekap, Mesra dan Berhemah.
43. PR-022-L18547  
**Datuk Dr. Marcus Mojigoh [ Putatan ]** minta **MENTERI DALAM NEGERI** menyatakan :-
- (a) langkah Kerajaan dalam menangani masalah pemandu seperti memandu perlahan di lorong laju dan kegiatan Mat Rempit; dan

- (b) adakah Kerajaan akan memperkenalkan undang-undang untuk menghukum mereka yang melakukan kesalahan ini.
44. PR-022-L18628  
**Tuan Azan bin Ismail [ Indera Mahkota ]** minta **MENTERI LUAR NEGERI** menyatakan sama ada Kerajaan mempunyai cadangan untuk mengemukakan saman terhadap akhbar-akhbar luar negara yang memfitnah dan berniat jahat dengan menjatuhkan imej negara dan pentadbiran kita.
45. PR-022-L18937  
**Dato' Seri Anwar bin Ibrahim [ Permatang Pauh ]** minta **PERDANA MENTERI** menyatakan apakah tindakan susulan terhadap Laporan Suruhanjaya Video V. K. Lingam serta aduan-aduan yang diterima berhubung salah laku hakim-hakim. Jelaskan, apakah tindakan yang diambil terhadap aduan-aduan tersebut dan nyatakan sama ada Kod Etika Hakim 2008 akan disemak semula.
46. PR-022-L19480  
**Dato' Seri Mohammad Nizar bin Jamaluddin [ Bukit Gantang ]** minta **MENTERI PELAJARAN** menyatakan berapakah jumlah peruntukan yang telah dikeluarkan oleh pihak Kementerian untuk menaik taraf sekolah-sekolah SJK (C) dan SJK (T) dalam bentuk penyediaan kemudahan pembelajaran dan peningkatan pencapaian.
47. PR-022-L19005  
**Dato' Abdul Manan bin Ismail [ Paya Besar ]** minta **MENTERI KEWANGAN** menyatakan sejauh mana penglibatan institusi perbankan dan komuniti perniagaan bekerjasama dengan Kerajaan bagi mewujudkan lebih banyak peluang pekerjaan dan perniagaan di kalangan rakyat negara ini.
48. PR-022-L19329  
**Dato' Zahrain Mohamed Hashim [ Bayan Baru ]** minta **MENTERI PERTAHANAN** menyatakan bilangan anggota tentera yang terlibat dalam penagihan dadah dan usaha-usaha membendung gejala buruk ini.
49. PR-022-L19602  
**Puan Nurul Izzah Binti Anwar [ Lembah Pantai ]** minta **PERDANA MENTERI** menyatakan bilakah Kerajaan bersedia membatalkan sistem permit teksi sedia ada yang memberi ruang untuk rasuah berlaku dan membebankan rakyat terbanyak.

50. PR-022-L19090  
**Tuan William Leong Jee Keen [ Selayang ]** minta **MENTERI PELANCONGAN** menyatakan apakah sebab-sebab kerugian Pempena Sdn. Bhd. pada tahun 2006, 2007 dan 2008 serta apakah tindakan yang akan diambil untuk menuntut kerugian daripada pihak-pihak berkenaan.
51. PR-022-L19356  
**Dr. Mohd Hatta bin Md Ramli [ Kuala Krai ]** minta **MENTERI PELAJARAN** menyatakan jumlah guru Kementerian yang dipinjamkan ke sekolah-sekolah agama kendalian Kerajaan Negeri Kelantan dan sama ada kekananan mereka di Kementerian terjejas dengan peminjaman ini.
52. PR-022-L18875  
**Datuk Halimah binti Mohd Sadique [ Tenggara ]** minta **MENTERI SAINS, TEKNOLOGI DAN INOVASI** menyatakan apakah usaha Kementerian dalam memastikan setiap kajian yang dibiayai melalui geran seperti ScienceFund, TechnoFund dan DAGS dapat memberi impak yang positif kepada Malaysia.
53. PR-022-L19749  
**Tuan Karpal Singh [ Bukit Gelugor ]** minta **MENTERI DALAM NEGERI** menyatakan sama ada pihak Kerajaan bersedia untuk memansuhkan Akta Hasutan 1948 yang digubal oleh Kerajaan British bagi tujuan menghentikan bantahan-bantahan terhadap pembentukan Malayan Union yang dicadangkan Kerajaan British. Jika tidak, nyatakan sebabnya.
54. PR-022-L19556  
**Tuan Zulkifli bin Noordin [ Kulim Bandar Baru ]** minta **MENTERI PENGANGKUTAN** menyatakan mengapa Kerajaan masih membenarkan Syarikat Penerbangan MAS menjual arak dan minuman keras semasa dalam penerbangan sedangkan banyak syarikat penerbangan antarabangsa lain seperti Emirates, Saudi Air tidak membenarkannya.
55. PR-022-L19712  
**Datuk Nur Jazlan Bin Mohamed [ Pulau ]** minta **PERDANA MENTERI** menyatakan langkah-langkah yang diambil oleh Kerajaan untuk mendapatkan maklum balas dari rakyat mengenai konsep 1 Malaysia dan kaedah penilaian yang digunakan sama ada konsep tersebut difahami oleh rakyat.

56. PR-022-L18706  
**Dr. Mujahid bin Haji Yusof Rawa [ Parit Buntar ]** minta **MENTERI PERDAGANGAN ANTARABANGSA DAN INDUSTRI** menyatakan perkembangan dasar menghapuskan dasar kawalan ketat bagi import gula dan tepung yang dikatakan boleh melahirkan kronisme dalam pemberian AP. apakah mekanisme gantian yang akan diperkenalkan dan bila.
57. PR-022-L20046  
**Tuan Khalid bin Abdul Samad [ Shah Alam ]** minta **PERDANA MENTERI** menyatakan apakah rasionalnya pembinaan jambatan ketiga ke Singapura dan apakah status perancangan untuk membina jambatan bengkok ke negara itu.
58. PR-022-L19326  
**Dato' Kamarul Baharin bin Abbas [ Telok Kemang ]** minta **PERDANA MENTERI** menyatakan senarai projek-projek pembangunan Kerajaan Persekutuan bagi kawasan Parlimen Telok Kemang di bawah RMK-9, butiran kos projek-projek tersebut dan kontraktor-kontraktornya serta status pelaksanaannya.
59. PR-022-L19260  
**Dr. Lee Boon Chye [ Gopeng ]** minta **MENTERI KEMAJUAN LUAR BANDAR DAN WILAYAH** menyatakan jumlah elaun yang dibayar setiap tahun untuk JKKKP di negeri-negeri seperti Kelantan, Pulau Pinang, Kedah dan Selangor.
60. PR-022-L19217  
**Dato' Rashid bin Din [ Merbok ]** minta **PERDANA MENTERI** menyatakan dalam jawapan No. 22, 10 Mac 2009, pertanyaan Lisan Dewan Rakyat, apakah Petunjuk Prestasi Utama (KPI) yang telah dibangunkan dan dipersetujui untuk Ketua Setiausaha Kementerian, Ketua Perkhidmatan dan Ketua Pengarah untuk tahun 2008, dan sejauh manakah KPI ini dilaksanakan oleh tiap-tiap negeri penjawat jawatan yang berkenaan.
61. PR-022-L19816  
**Puan Chong Eng [ Bukit Mertajam ]** minta **MENTERI DALAM NEGERI** menyatakan adakah wujud sebarang Petunjuk Prestasi Utama (KPI) untuk mengukur kecekapan PDRM dalam menangani kadar jenayah.
62. PR-022-L19735  
**Dato' Seri Abdul Hadi bin Awang [ Marang ]** minta **PERDANA MENTERI** menyatakan peratusan hotel bertaraf empat bintang ke atas yang memiliki sijil halal yang dikeluarkan oleh Perbadanan Pembangunan Industri Halal (HDC).

63. PR-022-L19189  
**Tuan Gwo-Burne Loh [ Kelana Jaya ]** minta **MENTERI KEWANGAN** menyatakan alasan mengapa prasarana, Menteri Kewangan dan EPU masih belum mengumumkan hasil kajian pembinaan LRT Subang Jaya yang bernilai RM5 bilion.
64. PR-022-L18807  
**Dr. Haji Mohd Hayati Bin Othman [ Pendang ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah 'Program Cari' yang dilaksanakan oleh Kementerian dapat mengurangkan bebanan masyarakat kurang berada dan jumlah peruntukan yang disalurkan setakat ini.
65. PR-022-L19504  
**Dr. Siti Mariah Binti Mahmud [ Kota Raja ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perancangan Kerajaan untuk memastikan pelaksanaan infrastruktur awam yang mesra OKU (orang kurang upaya) dikuatkuasakan oleh semua institusi Kerajaan serta swasta di seluruh negara dan setakat ini berapa peratus kemudahan awam dan bangunan awam boleh dikira sebagai mesra OKU.
66. PR-022-L20079  
**Dato' Kamarudin Bin Jaffar [ Tumpat ]** minta **MENTERI LUAR NEGERI** menyatakan apakah langkah-langkah terkini Kerajaan untuk menyelesaikan masalah Palestin.
67. PR-022-L19507  
**Dato' Seri Haji Azmi bin Khalid [ Padang Besar ]** minta **PERDANA MENTERI** menyatakan apakah dasar dan perancangan Kerajaan untuk membangunkan pekan-pekan kecil di kawasan-kawasan sempadan Malaysia / Thailand memandangkan pekan-pekan ini mempunyai potensi yang besar untuk mempertingkatkan pendapatan per kapita khususnya bagi penduduk-penduduk luar bandar.
68. PR-022-L18907  
**Tuan Gobalakrishan a/l Nagapan [ Padang Serai ]** minta **MENTERI PERUMAHAN DAN KERAJAAN TEMPATAN** menyatakan mengapa projek perumahan Desaku di kawasan Parlimen Padang Serai sudah lebih 4 tahun terbengkalai masih lagi belum disiapkan.

69. PR-022-L19751  
**Tuan Loke Siew Fook [ Rasah ]** minta **PERDANA MENTERI** menyatakan sama ada pentadbiran baru akan mengubah dasar dalam pengendalian peruntukan khas kawasan Parlimen termasuk kawasan yang diwakili pembangkang dan berapakah peruntukan yang diberikan untuk setiap kawasan Parlimen untuk tahun 2009.
70. PR-022-L18894  
**Tuan Manikavasagam a/l Sundaram [ Kapar ]** minta **MENTERI PERDAGANGAN ANTARABANGSA DAN INDUSRTI** menyatakan adakah Kerajaan bercadang mewujudkan Institusi Pembangunan Usahawan bagi bukan Bumiputera memandangkan Perbadanan Usahawan Nasional Malaysia hanya ditubuhkan bagi membantu usahawan Bumiputera. Sekiranya ya, bila ianya akan dilaksanakan dan sekiranya tidak, apakah justifikasi keengganan Kerajaan membantu rakyatnya sendiri.
71. PR-022-L19037  
**Puan Hajah Zuraida binti Kamaruddin [ Ampang ]** minta **PERDANA MENTERI** menyatakan adakah Kerajaan akan membenarkan semula bas mini beroperasi memandangkan ia lebih efisien dan menetapi masa berbanding dengan bas yang sedia ada.
72. PR-022-L18723  
**Tuan Aaron Ago Anak Dagang [ Kanowit ]** minta **MENTERI DALAM NEGERI** menyatakan jenis, jumlah dan nilai dadah yang telah dikesan atau dirampas dalam tempoh 5 tahun yang lalu. Nyatakan langkah-langkah yang diambil oleh Kerajaan selama ini untuk membendung gejala dadah.
73. PR-022-L18608  
**Ir. Haji Hamim Bin Samuri [ Ledang ]** minta **MENTERI SUMBER MANUSIA** menyatakan tentang cadangan skim pencen melalui KWSP, apakah ini satu idea yang terbaik atau sekadar satu alasan untuk menafikan hak pencarum mengeluarkan wang mereka sekali gus bagi tujuan masing-masing seperti perniagaan dan lain-lain.
74. PR-022-L19378  
**Tuan Fong Kui Lun [ Bukit Bintang ]** minta **MENTERI WILAYAH PERSEKUTUAN** menyatakan langkah-langkah penyelesaian isu projek terbengkalai Plaza Rakyat dan menaik taraf Hentian Puduraya yang memburukkan pemandangan dan penyebab kesesakan lalu lintas.

75. PR-022-L19521  
**Dato' Haji Mahfuz bin Omar [ Pokok Sena ]** minta **MENTERI LUAR NEGERI** menyatakan apakah langkah-langkah yang diambil terhadap media antarabangsa yang melaporkan berita-berita yang memburukkan nama YAB. Perdana Menteri dan negara.
76. PR-022-L18645  
**Tuan Abdullah Sani bin Abdul Hamid [ Kuala Langat ]** minta **MENTERI DALAM NEGERI** menyatakan tangkapan dan pendakwaan terhadap majikan yang mengambil pekerja asing yang tiada dokumen kerja dan berapa orang pekerja tersebut telah dihantar pulang pada 1 Januari 2008 hingga 1 Mei 2009.
77. PR-022-L19829  
**Datuk Haji Baharum Bin Mohamed [ Sekijang ]** minta **MENTERI DALAM NEGERI** menyatakan sejauh mana penukaran istilah panggilan 'Mat Rempit' kepada 'samseng jalanan' boleh membantu menyelesaikan gejala sosial ini.
78. PR-022-L19683  
**Tuan Mohamed Azmin bin Ali [ Gombak ]** minta **MENTERI PERTAHANAN** menyatakan :-
- (a) sejauh manakah pemantauan yang dibuat oleh Kerajaan di kem-kem Latihan Khidmat Negara dari aspek kebersihan dan kualiti makanan yang dibekalkan kepada pelatih; dan
  - (b) sehingga kini, berapakah bilangan kes dan jenis saman oleh keluarga peserta PLKN terhadap pengelola program tersebut.
79. PR-022-L18576  
**Tuan Haji Che Uda bin Che Nik [ Sik ]** minta **MENTERI PERTANIAN DAN INDUSTRI ASAS TANI** menyatakan mengenai kedudukan Projek Ternakan Puyuh di Sungai Setar, Jeneri, Sik yang melibatkan peruntukan RM 420,000 setahun sedangkan projek ini hanya melibatkan seorang penduduk di bawah skim PPRT dan projek ini selalu mengalami kerugian. Apakah perancangan Kementerian untuk mengatasi perkara ini.

80. PR-022-L20013  
**Tuan Er Teck Hwa [ Bakri ]** minta **MENTERI SUMBER ASLI DAN ALAM SEKITAR** menyatakan mengapa jarak zon industri petrokimia dan maritim di Sungai Pulai dibina kurang dari 1km dari kawasan kampung di Mukim Serkat, Pontian memandangkan kajian menunjukkan bahawa penduduk-penduduk yang menetap lingkungan 3km dari kawasan industri petrokimia menghadapi risiko tinggi menghadapi penyakit kanser dan kelahiran awal kepada bayi.
81. PR-022-L19163  
**Tuan Hee Loy Sian [ Petaling Jaya Selatan ]** minta **PERDANA MENTERI** menyatakan apakah hasil perbincangan Kerajaan dengan syarikat-syarikat konsesi tol dalam rancangan untuk mengambil alih syarikat konsesi tol serta penurunan kadar tol sepertimana yang dinyatakan oleh YAB. Perdana Menteri beberapa bulan lalu.
82. PR-022-L19305  
**Tuan William @ Nyallau Anak Badak [ Lubok Antu ]** minta **MENTERI PEMBANGUNAN WANITA, KELUARGA DAN MASYARAKAT** menyatakan setakat mana kemajuan 'Program Cari' yang sedang dilaksanakan di kawasan Parlimen Lubok Antu setakat ini.
83. PR-022-L18551  
**Tuan Haji Ahmad bin Kasim [ Kuala Kedah ]** minta **MENTERI KEWANGAN** menyatakan jumlah wang yang dirampas oleh Kerajaan sejak tahun 2000, serta ke manakah wang ini dibelanjakan dan jenis-jenis kesalahan yang menyebabkan wang ini dirampas.
84. PR-022-L19171  
**Tuan Charles Anthony A/L R.Santiago [ Klang ]** minta **PERDANA MENTERI** menyatakan kesanggupan Kerajaan untuk mengkaji semula Pendapatan Garis Kemiskinan (PGK) yang diguna pakai masa kini dan menyatakan kesediaan Kerajaan untuk menggunakan satu PGK yang realistik dan wajar, iaitu sebanyak RM1500 sebulan, bagi mengkategorikan isi rumah miskin dalam negara.
85. PR-022-L19636  
**Datuk Haji Idris Bin Haji Haron [ Tangga Batu ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan apakah langkah-langkah yang diambil oleh Kerajaan dari segi melindungi pengguna-pengguna Islam daripada produk yang tidak halal.

86. PR-022-L18736  
**Datuk Md.Sirat bin Abu [ Bukit Katil ]** minta **PERDANA MENTERI** menyatakan bahawa pihak Kerajaan telah melakukan satu usaha yang baik dalam membantu golongan miskin dengan memperuntukkan saham berjumlah RM100 juta kepada yang layak. Apakah langkah-langkah Kerajaan bagi memastikan pelaburan saham ini menguntungkan pemilikinya dalam situasi ekonomi dunia hari ini.
87. PR-022-L19948  
**Tuan Mohd. Nasir bin Zakaria [ Padang Terap ]** minta **MENTERI PENGAJIAN TINGGI** menyatakan polisi Kementerian untuk merangsang rakyat menyambung pelajaran ke peringkat lebih tinggi yang diberi dalam bentuk insentif dermasiswa, biasiswa, cuti bergaji, dana penyelidikan terutama dalam bidang kemanusiaan bagi melahirkan keseimbangan dengan sektor teknikal.
88. PR-022-L19673  
**Dr. Hiew King Cheu [ Kota Kinabalu ]** minta **MENTERI PENGANGKUTAN** menyatakan bilakah peruntukan kewangan sebanyak RM50 juta untuk 'South Bus Terminal' yang dicadangkan berhampiran dengan KKIA diberikan memandangkan terminal bus tersebut sangatlah mustahak untuk menyelesaikan kesesakan lalu lintas di Kota Kinabalu.
89. PR-022-L18524  
**Tuan Teng Boon Soon [ Tebrau ]** minta **MENTERI DALAM NEGERI** menyatakan kadar kekurangan anggota PDRM mengikut piawai yang sedia ada di setiap negeri. Apakah langkah-langkah sedang diambil untuk meningkatkan tenaga PDRM memandangkan peningkatan kadar jenayah yang masih tidak dapat dibendung.
90. PR-022-L19448  
**Dr. Lo' Lo' binti Mohamad Ghazali [ Titiwangsa ]** minta **MENTERI DALAM NEGERI** menyatakan statistik bagi bilangan kanak-kanak di bawah umur 13 tahun yang telah dilaporkan hilang dan diculik dan berapakah bilangan yang masih gagal ditemui secara hidup dan mati serta bilangan yang masih gagal ditemui sejak 10 tahun lalu dan apakah perkembangan kes Nurin dan Sharlinie.
91. PR-022-L19431  
**Puan Siti Zailah binti Mohd. Yusoff [ Rantau Panjang ]** minta **PERDANA MENTERI** menyatakan adakah Kerajaan mengiktiraf tandatangan pengesahan yang dibuat oleh Ahli Parlimen Pakatan Rakyat dalam borang-borang permohonan yang dikeluarkan oleh agensi Kerajaan Persekutuan.

92. PR-022-L19982  
**Tuan Liew Chin Tong [ Bukit Bendera ]** minta **MENTERI PERTAHANAN** menyatakan sama ada Kementerian mendedahkan hasil perbincangan tentera darat dengan Cina dalam pembelian sistem enam unit FN6 MANPAD seperti yang dilaporkan di dalam laporan tahunan Kementerian 2006. Apakah alasan memilih FN6, kos pembelian dan tarikh penghantaran tersebut.
93. PR-022-L19682  
**Dato' Haji Ismail Bin Haji Mohamed Said [ Kuala Krau ]** minta **MENTERI SUMBER MANUSIA** menyatakan kemajuan cadangan Kerajaan untuk menubuhkan institut pembantu rumah untuk warga tempatan bagi mengurangkan penggantungan kepada pembantu rumah warga asing.
94. PR-022-L19296  
**Tuan Tan Tee Beng [ Nibong Tebal ]** minta **MENTERI KEMAJUAN LUAR BANDAR DAN WILAYAH** menyatakan sama ada terdapat rancangan untuk membina rumah PPRT dalam tahun 2009 dan 2010, khususnya di kawasan luar bandar seperti Nibong Tebal.
95. PR-022-L19312  
**Tuan Wee Choo Keong [ Wangsa Maju ]** minta **MENTERI DALAM NEGERI** menyatakan memandangkan kadar jenayah di Wangsa Maju yang sentiasa meningkat , apakah tindakan yang akan diambil oleh pihak Kementerian untuk menentang gejala ini dan sama ada pihak Kementerian ingin menambahkan bilangan pegawai polis di kawasan ini dan apakah tindakan tegas yang akan diambil terhadap 'snatch thieves'.
96. PR-022-L19759  
**Tuan Lim Kit Siang [ Ipoh Timur ]** minta **MENTERI DALAM NEGERI** menyatakan sampai bila syarat-syarat yang dikenakan ke atas lima orang bekas tahanan ISA dari Hindraf akan dibatalkan dan apakah rasional pihak berkuasa mengenakan syarat-syarat berkenaan sedangkan tiada bukti menunjukkan kelima-lima mereka itu ancaman kepada keselamatan negara.
97. PR-022-L19150  
**Tuan Liang Teck Meng [ Simpang Renggam ]** minta **MENTERI KEWANGAN** menyatakan apakah sebabnya levi sebanyak RM200 dikenakan kepada lori yang mengeksport barangan melalui Kastam Johor Bharu sahaja tetapi dikecualikan di kastam lain.

98. PR-022-L18774  
**Tan Sri Dato' Seri Ong Ka Ting [ Kulai ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan adakah Kerajaan telah siap mengkaji semula 'Garis Panduan Penyertaan Asing dalam Sektor Pengedaran Perdagangan' yang diguna pakai secara pentadbiran antara tahun 2007 hingga 2008. Jika belum, adakah Kerajaan menimbang untuk tidak melaksanakannya.
99. PR-022-L19280  
**Tuan Amran bin Ab Ghani [ Tanah Merah ]** minta **MENTERI DALAM NEGERI** menyatakan kenapakah pihak PDRM dan JPJ sering kali mengadakan sekatan jalan raya di selekoh merbahaya, adakah tindakan itu dibenarkan oleh undang-undang.
100. PR-022-L18510  
**Datuk Haji Mohamed Bin Haji Aziz [ Sri Gading ]** minta **MENTERI DALAM NEGERI** menyatakan apakah tindakan yang benar-benar berkesan boleh diambil untuk menangani mat rempit dan kes ragut.
101. PR-022-L18757  
**Dato' Dr. Zainal Abidin bin Ahmad [ Hulu Selangor ]** minta **MENTERI PENGAJIAN TINGGI** menyatakan sejauh manakah kegawatan ekonomi global masa kini memberi kesan kepada daya saing dan sumber pendapatan Institut Pengajian Tinggi Swasta (IPTS). Apakah rancangan dan strategi Kementerian untuk membantu IPTS seluruh negara supaya mengekalkan daya saing dan mengurangkan kesan kegawatan ekonomi dunia semasa.
102. PR-022-L19526  
**Puan Hajah Fuziah binti Salleh [ Kuantan ]** minta **MENTERI PELAJARAN** menyatakan sejauh manakah pencapaian Pelan Induk Pembangunan Pendidikan secara keseluruhannya dan jelaskan kejayaan dari segi pencapaian akademik dan sahsiah pelajar, serta dalam usaha merapatkan jurang pendidikan luar bandar.
103. PR-022-L19467  
**Tuan Muhammad bin Husain [ Pasir Puteh ]** minta **PERDANA MENTERI** menyatakan adakah Kerajaan bercadang untuk memberi cuti bergaji penuh 60 hari kepada kakitangan Kerajaan yang bersalin anak ke enam (6) dan seterusnya dalam usaha menggalakkan kelahiran bagi mencapai sasaran 70 juta penduduk menjelang 2020.

104. PR-022-L18964  
**Tuan Mohsin Fadzli bin Haji Samsuri [ Bagan Serai ]** minta **MENTERI PERTANIAN DAN INDUSTRI ASAS TANI** menyatakan :-
- (a) tindakan dan langkah yang telah diambil dalam usaha menaik taraf sistem saliran dan perparitan untuk meningkatkan hasil pengeluaran padi; dan
  - (b) berapakah kadar bayaran pembersihan parit untuk satu meter dan kenapa penggunaan racun masih berleluasa digunakan oleh kontraktor.
105. PR-022-L19117  
**Dato' Lilah bin Yasin [ Jempol ]** minta **MENTERI PENERANGAN, KOMUNIKASI DAN KEBUDAYAAN** menyatakan :-
- (a) berapakah peruntukan Kementerian bagi Kempen Galakkan Membaca; dan
  - (b) nyatakan berapakah Perpustakaan Desa yang telah didirikan dan jumlah peruntukan aktiviti Kempen Gerakan Membaca disediakan di setiap Perpustakaan Desa.
106. PR-022-L20106  
**Tuan Tony Pua Kiam Wee [ Petaling Jaya Utara ]** minta **MENTERI PELANCONGAN** menyatakan tindakan tegas yang akan diambil terhadap pekerja, pengurus dan pengarah Syarikat Pempena dahulu dan kini yang telah didapati menyeleweng dan menyebabkan kerugian sekurang-kurangnya RM34 juta dalam laporan audit yang telah pun disiapkan.
107. PR-022-L18908  
**Tuan John a/l Fernandez [ Seremban ]** minta **PERDANA MENTERI** menyatakan apakah pihak Kementerian tidak bercadang untuk meningkatkan cuti kakitangan awam seperti berikut:-
- (a) cuti bersalin dari 2 bulan kepada 3 bulan; dan
  - (b) cuti bersalin suami (paternity) dari 1 minggu kepada 2 minggu dan cuti kesedihan (bereavement) dari 3 hari kepada 1 bulan.

108. PR-022-L19597  
**Tuan Sivarasa a/l K. Rasiah [ Subang ]** minta **MENTERI KERJA RAYA** menyatakan kenapa National Slope Master Plan yang telah di janji akan disiapkan dan dikuatkuasakan pada tahun 2008 untuk menjaga keselamatan cerun-cerun di Malaysia dan memantau pembangunan di cerun-cerun masih tidak diumumkan.
109. PR-022-L19197  
**Dato' Noraini binti Ahmad [ Parit Sulong ]** minta **MENTERI PELAJARAN** menyatakan langkah-langkah yang telah, sedang dan akan diambil oleh Kementerian dalam memperkasakan tulisan jawi di sekolah-sekolah Kerajaan. Adakah Kerajaan berhasrat memberikan insentif khas kepada guru-guru yang mengajar tulisan jawi.
110. PR-022-L19869  
**Dato' Haji Wan Abd Rahim bin Wan Abdullah [ Kota Bharu ]** minta **PERDANA MENTERI** menyatakan adakah Kerajaan berhasrat menambah bilangan ahli-ahli Suruhanjaya Pilihan Raya supaya meliputi wakil-wakil parti politik utama dalam negara.
111. PR-022-L18756  
**Dato' Ibrahim bin Ali [ Pasir Mas ]** minta **PERDANA MENTERI** menyatakan secara terperinci bahawa kepentingan kaum Bumiputera termasuk 'Hak Keistimewaan Melayu' yang dijamin dalam Perlembagaan di bawah Fasal 153 tidak terjejas di bawah dasar liberalisasi 1 Malaysia.
112. PR-022-L19922  
**Tuan Haji Taib Azamudden bin Md Taib [ Baling ]** minta **MENTERI SUMBER MANUSIA** menyatakan berapakah jumlah rakyat tempatan yang telah dibuang kerja dan masih belum mendapat kerja tetap dan apakah langkah Kerajaan untuk menyelamatkan pekerja tempatan yang telah dibuang kerja.
113. PR-022-L18511  
**Puan Fong Po Kuan [ Batu Gajah ]** minta **MENTERI DALAM NEGERI** menyatakan apakah pendekatan terbaru oleh PDRM untuk mencegah dan membanteras kejadian jenayah yang semakin menggerunkan seperti penculikan, pembunuhan, ragut dan rompak. Nyatakan punca-punca masalah jenayah yang semakin mengganas ini.
114. PR-022-L19801  
**Dato' Mohd Nasir bin Ibrahim Fikri [ Kuala Nerus ]** minta **MENTERI PERUMAHAN DAN KERAJAAN TEMPATAN** menyatakan berapa lamakah masa yang diperlukan bagi membolehkan rumah-rumah terbengkalai diambil alih oleh Kementerian untuk di baik pulih.

115. PR-022-L18704  
**Tuan Kulasegaran a/l Murugeson [ Ipoh Barat ]** minta **MENTERI LUAR NEGERI** menyatakan :-
- (a) kenapakah Malaysia berniat untuk memberhentikan percubaan untuk meneliti dan mencela segala rekod hak asasi manusia di Sri Lanka semasa peperangan menentang LTTE; dan
  - (b) jumlah wang dan lain-lain yang disalurkan oleh Malaysia kepada Sri Lanka serta tahap kepastian di mana wang disalurkan sebenarnya dibelanjakan bagi pemulihan pelarian Tamil.
116. PR-022-L20044  
**Puan Teo Nie Ching [ Serdang ]** minta **MENTERI PELAJARAN** menyatakan secara terperinci kegunaan peruntukan sebanyak RM100 juta di bawah RMK-9 untuk Sekolah Bantuan Kerajaan setakat ini. Nyatakan sekolah-sekolah yang telah menerima peruntukan, jumlah dan tujuan peruntukan diberi.
117. PR-022-L19059  
**Tuan Salleh bin Kalbi [ Silam ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah usaha pihak Kementerian dalam membantu usahawan tani Bumiputera berkaitan pemasaran produk bagi menembusi pasaran seperti ke Giant dan Carrefour bagi membolehkan mereka menembusi pasaran 'hypermarket' tanpa khidmat orang tengah.
118. PR-022-L18596  
**Tuan Chua Tian Chang [ Batu ]** minta **MENTERI DALAM NEGERI** menyatakan :-
- (a) apakah sebab YAB. Perdana Menteri tidak membebaskan tanpa syarat kesemua tahanan ISA pada awal bulan April selepas 13 tahanan dibebaskan; dan
  - (b) adakah Kerajaan mempunyai bukti yang kukuh membuktikan 3 tahanan ISA pada 1 April 2009 mempunyai hubung kait dengan Jemaah Islamiah serta ancaman keselamatan negara.

119. PR-022-L19345  
**Dato' Shamsul Anuar bin Nasarah [ Lenggong ]** minta **MENTERI PENGAJIAN TINGGI** menyatakan kesan dari segi pencapaian akademik, pembinaan sahsiah dan kepimpinan kepada siswazah apabila pelaksanaan Akta Universiti dan Kolej Universiti (AUKU):-
- (a) apakah isu-su yang dibangkitkan mahasiswa selama ini selesai setelah AUKU dipinda; dan
  - (b) sejauh mana kualiti mahasiswa di universiti awam berbanding universiti swasta dalam negara ini dan bagaimana ukuran ini dilakukan.
120. PR-022-L19861  
**Tuan Chong Chieng Jen [ Bandar Kuching ]** minta **MENTERI KESIHATAN** menyatakan sama ada Kerajaan berhasrat membina bangunan tempat letak kereta bertingkat di Hospital Umum Kuching untuk mengatasi masalah kekurangan tempat letak kereta di hospital itu yang begitu serius.
121. PR-022-L19838  
**Dato' Haji Abd Rahman bin Dahlan [ Kota Belud ]** minta **MENTERI PENERANGAN, KOMUNIKASI DAN KEBUDAYAAN** menyatakan berapa ramaikah pemimpin pembangkang yang dijemput oleh RTM untuk hadir dalam program-program bicara dan debat (talk show) sejak Mac 2008 dan oleh stesen-stesen penyiaran swasta.
122. PR-022-L19407  
**Dr. Michael Jeyakumar Devaraj [ Sungai Siput ]** minta **MENTERI DALAM NEGERI** menyatakan bilangan Pendatang Asing Tanpa Izin (PATI) yang dibuang di sempadan Malaysia-Thailand dalam tahun 2006, 2007 dan 2008 mengikut negara asal dan jantina setiap PATI.

**PADA PERMULAAN URUSAN MESYUARAT**  
**MENGEMUKAKAN RANG UNDANG-UNDANG KERAJAAN**  
**UNTUK BACAAN KALI YANG PERTAMA**

1. **Menteri Perdagangan Antarabangsa dan Industri**

- \* Rang Undang-undang Perbadanan Pembangunan Industri Kecil dan Sederhana (Pindaan) 2009

---

\* Menandakan bahawa Rang Undang-undang ini akan dibawa pada semua peringkat di mesyuarat ini.

## ATURAN URUSAN MESYUARAT DAN USUL-USUL

- |    |                |   |                               |
|----|----------------|---|-------------------------------|
| 1. | (D.R. 19/2008) | Rang Undang-undang Lembaga Hasil Dalam Negeri Malaysia (Pindaan) 2008 – <b>Pertimbangan dalam Jawatankuasa Sebuah-buah Majlis (17 Jun, 2009)</b><br><br><b>(Kementerian Kewangan)</b> |                               |
| 2. | (D.R. 20/2008) | Rang Undang-undang Makanan Haiwan 2008.<br><b>(Kementerian Pertanian dan Industri Asas Tani)</b>  | <b>Bacaan Kali yang Kedua</b> |
| 3. | (D.R. 26/2008) | Rang Undang-undang Pengangkutan Jalan (Pindaan) 2008.<br><b>(Kementerian Pengangkutan)</b>  | “                             |
| 4. | (D.R. 13/2008) | Rang Undang-undang Identifikasi Asid Deoksiribonukleik (DNA) 2008 - Pertimbangan dalam Jawatankuasa sebuah-buah Majlis (28 Ogos 2008).<br><b>(Kementerian Dalam Negeri)</b>           |                               |
| 5. | (D.R. 30/2008) | Rang Undang-undang Jawatankuasa Etika Hakim 2008.<br><b>(Perdana Menteri)</b>   | “                             |
| 6. | (D.R. 29/2008) | Rang Undang-undang Bank Kerjasama Rakyat Malaysia Berhad (Peruntukan Khas) (Pindaan) 2008.<br><b>(Kementerian Kewangan)</b>   | “                             |
| 7. | (D.R. 4/2009)  | Rang Undang-undang Suruhanjaya Integriti Agensi Penguatkuasaan 2009.<br><b>(Perdana Menteri)</b>  | “                             |
| 8. | (D.R. 8/2009)  | Rang Undang-undang Bank Negara Malaysia 2009<br><b>(Kementerian Kewangan)</b>   | “                             |

9. **Menteri Kewangan** akan mencadangkan :-

“Bahawa Dewan ini, menurut Peraturan 66A dan 67B Peraturan-peraturan Majlis Mesyuarat Dewan Rakyat:

“BAHAWASANYA, berikutan pelantikan Y.A.B. Perdana Menteri Malaysia yang ke-enam, Y.A.B. Perdana Menteri telah mengumumkan penyusunan semula beberapa Kementerian berkuat kuasa 10 April 2009 seperti berikut:

- (a) Fungsi-fungsi dan agensi-agensi di bawah Kementerian Pembangunan Usahawan dan Koperasi diserap ke Jabatan Perdana Menteri, Kementerian Perdagangan Dalam Negeri, Koperasi dan Kepenggunaan, Kementerian Perdagangan Antarabangsa dan Industri, Kementerian Kerja Raya, Kementerian Kewangan, Kementerian Kemajuan Luar Bandar dan Wilayah dan Kementerian Pertanian dan Industri Asas tani;
- (b) Fungsi-fungsi dan agensi-agensi di bawah Kementerian Perpaduan, Kebudayaan, Kesenian dan Warisan diserap ke Jabatan Perdana Menteri dan Kementerian Penerangan, Komunikasi dan Kebudayaan; dan
- (c) Fungsi Kementerian Tenaga, Air dan Komunikasi yang kini dikenali sebagai Kementerian Tenaga, Teknologi Hijau dan Air berkaitan dengan komunikasi dan agensi di bawahnya iaitu Suruhanjaya Komunikasi dan Multimedia dipindahkan ke Kementerian Penerangan, Komunikasi dan Kebudayaan.

DAN BAHAWASANYA –

- (i) perbelanjaan pengurusan bagi maksud-maksud yang melibatkan Kementerian yang disusun semula itu telah diperuntukkan melalui Akta Perbekalan 2009 (Akta A1340);
- (ii) amaun yang belum dibelanjakan yang berhubungan dengan Kementerian- kementerian yang peruntukan untuknya perlu dikurangkan itu telah disekat melalui waran yang dikeluarkan oleh Menteri Kewangan di bawah perenggan 13(3)(b) Akta Tatacara Kewangan 1957 [Akta 61];
- (iii) perbelanjaan pembangunan bagi maksud-maksud yang melibatkan Kementerian-kementerian yang disusun semula telah diluluskan oleh Dewan ini dan diperuntukkan bagi maksud-maksud seperti yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2009;

- (iv) amaun yang belum dibelanjakan yang berhubungan dengan Kementerian-kementerian yang peruntukan untuknya perlu dikurangkan itu telah disekat melalui waran yang dikeluarkan oleh Menteri Kewangan di bawah seksyen 8 Akta Kumpulan Wang Pembangunan 1966 [Akta 406];
- (v) bagi Kementerian-kementerian yang disusun semula itu, perlu dibuat penguntukan semula peruntukan perbelanjaan pengurusan dan pembangunannya berikutan dengan penyusunan semula fungsi-fungsinya;
- (vi) menurut Peraturan Majlis Mesyuarat 66A Peraturan-Peraturan Majlis Mesyuarat Dewan Rakyat, tertakluk kepada suatu Rang Undang-Undang Perbekalan yang telah diluluskan mengikut Peraturan Mesyuarat 66, mana-mana penguntukan semula peruntukan perbelanjaan boleh dibuat melalui suatu usul oleh seorang Menteri,

MAKA, OLEH YANG DEMIKIAN, DEWAN INI membuat ketetapan seperti berikut:

1. Berkaitan dengan Perbelanjaan Mengurus –
  - (a) membenarkan pemindahan sejumlah wang tidak melebihi satu bilion lapan puluh lapan juta dua ratus tiga puluh enam ribu tiga ratus sembilan ringgit (RM1,088,236,309) di bawah Maksud B.26 Kementerian Pembangunan Usahawan dan Koperasi kepada Maksud B.06 Jabatan Perdana Menteri sebanyak dua belas juta satu ratus tujuh puluh ribu empat ratus tiga puluh dua ringgit (RM12,170,432), Maksud B.22 Kementerian Kemajuan Luar Bandar dan Wilayah sebanyak satu bilion lima puluh empat ribu lima ratus ringgit (RM1,000,054,500) Maksud B.24 Kementerian Perdagangan Antarabangsa dan Industri sebanyak empat juta tujuh ratus tiga ribu tujuh ratus sembilan puluh dua ringgit (RM4,703,792), Maksud B.25 Kementerian Perdagangan Dalam Negeri, Koperasi dan Kepenggunaan sebanyak enam puluh tiga juta lima ratus lapan puluh tujuh ribu lapan ratus lapan puluh lima ringgit (RM63,587,585) dan Maksud B.27 Kementerian Kerja Raya sebanyak tujuh juta tujuh ratus dua puluh ribu ringgit (RM7,720,000);

- (b) membenarkan pemindahan sejumlah wang tidak melebihi empat ratus dua puluh sembilan juta sembilan ratus ribu sembilan ratus lapan puluh tujuh ringgit (RM429,900,987) di bawah Maksud B.44 Kementerian Perpaduan, Kebudayaan, Kesenian dan Warisan kepada Maksud B.06 Jabatan Perdana Menteri sebanyak seratus lapan belas juta enam ratus empat puluh tujuh ribu lima ratus empat puluh tujuh ringgit (RM118,647,547) dan Maksud B.47 Kementerian Penerangan, Komunikasi dan Kebudayaan (dahulunya dikenali sebagai Kementerian Penerangan) sebanyak tiga ratus sebelas juta dua ratus lima puluh tiga ribu empat ratus empat puluh ringgit (RM311,253,440); dan
- (c) membenarkan pemindahan sejumlah wang tidak melebihi lima juta dua ratus tujuh belas ribu tujuh puluh enam ringgit (RM5,217,076) di bawah Maksud B.26 Kementerian Tenaga, Teknologi Hijau dan Air kepada Maksud B.47 Kementerian Penerangan, Komunikasi dan Kebudayaan (dahulunya dikenali sebagai Kementerian Penerangan).

2. Berkaitan dengan Perbelanjaan Pembangunan –

- (a) membenarkan pemindahan sejumlah wang tidak melebihi satu bilion tiga ratus enam puluh enam juta sembilan ratus sembilan puluh ribu empat ratus dua puluh lapan ringgit (RM1,366,990,428) di bawah Maksud P.26 Kementerian Pembangunan Usahawan dan Koperasi kepada Maksud P.06 Jabatan Perdana Menteri sebanyak enam juta enam ratus ribu ringgit (RM6,600,000), Maksud P.10 Perbendaharaan sebanyak tiga ratus dua puluh lima juta lapan ratus tiga puluh tujuh ribu lapan ratus ringgit (RM325,837,800), Maksud P.21 Kementerian Pertanian dan Industri Asas Tani sebanyak dua juta sembilan ratus ribu ringgit (RM2,900,000), Maksud P.22 Kementerian Kemajuan Luar Bandar dan Wilayah sebanyak enam ratus lapan puluh satu juta dua belas ribu ringgit (RM681,012,000) , Maksud P.24 Kementerian Perdagangan Antarabangsa dan Industri sebanyak dua ratus tujuh puluh empat juta enam ratus tujuh puluh lapan ribu lapan ratus sembilan puluh empat ringgit (RM274,678,894), Maksud P.25 Kementerian Perdagangan Dalam Negeri, Koperasi dan Kepenggunaan sebanyak tujuh puluh dua juta tiga ratus dua puluh enam ribu satu ratus sembilan puluh lima ringgit (RM72,326,195) dan Maksud P.27 Kementerian Kerja Raya sebanyak tiga juta enam ratus tiga puluh lima ribu lima ratus tiga puluh sembilan ringgit (RM3,635,539);

- (b) membenarkan pemindahan sejumlah wang tidak melebihi enam ratus tiga puluh tiga juta lima puluh sembilan ribu enam ratus dua puluh empat ringgit (RM633,059,624) di bawah Maksud P.29 Kementerian Tenaga, Teknologi Hijau dan Air kepada Maksud P.47 Kementerian Penerangan, Komunikasi dan Kebudayaan (dahulunya dikenali sebagai Kementerian Penerangan); dan
- (c) membenarkan pemindahan sejumlah wang tidak melebihi dua ratus sepuluh juta satu ratus dua puluh lima ribu tiga puluh sembilan ringgit (RM210,125,039) di bawah Maksud P.44 Kementerian Perpaduan, Kebudayaan, Kesenian dan Warisan kepada Maksud P.06 Jabatan Perdana Menteri sebanyak dua puluh enam juta tujuh puluh sembilan ribu tujuh ratus ringgit (RM26,079,700) dan Maksud P.47 Kementerian Penerangan, Komunikasi dan Kebudayaan (dahulunya dikenali sebagai Kementerian Penerangan) sebanyak satu ratus lapan puluh empat juta empat puluh lima ribu tiga ratus tiga puluh sembilan ringgit (RM184,045,339)."

10. **Menteri Kewangan** akan mencadangkan :-

"Bahawa Dewan ini, mengikut peruntukan subperenggan 8(3)(a)(iv), Akta Tatacara Kewangan 1957 [Akta 61], mengambil ketetapan bersetuju supaya Kerajaan menukarkan pinjaman Kerajaan Persekutuan sebanyak RM757,459,247 kepada ekuiti Bank Pertanian Malaysia Berhad, suatu syarikat yang dimiliki oleh Menteri Kewangan (Diperbadankan)".

11. PR-022-U18570

**Datuk Dr. Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa sistem pendawaian luar terutama sekali bagi bekalan elektrik pada ketika ini. Adalah amat usang dan ada kalanya amat tidak teratur mengambil maklum bahawa sistem pendawaian yang ada pada ketika ini juga boleh mendatangkan bahaya kepada para pengguna terutama sekali bagi pendawaian yang merentasi jalan raya. Dan mengambil maklum bahawa sistem pendawaian yang sedia ada juga merupakan pencemaran pemandangan di mana kabel yang dipasang sering kali kelihatan tidak teratur, berjuntai dan usang. Maka dengan ini Dewan ini hendaklah mengambil ketetapan untuk meminta Kerajaan untuk membuat dasar atau pun polisi bahawa semua pendawaian luar bagi bekalan elektrik, terutama sekali di kawasan perumahan dibuat melalui sistem pendawaian bawah tanah."

**[ Kementerian Tenaga, Teknologi Hijau dan Air ]**

12. PR-022-U18572

**Datuk Dr. Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa pemanasan dunia kini berada dalam keadaan yang kritikal dan salah satu daripada penyumbang kepada keadaan ini adalah penjanaan tenaga elektrik. Dan mengambil maklum bahawa bekalan bahan bakar bagi penjanaan kuasa elektrik juga semakin berkurangan.

Dan mengambil maklum bahawa keperluan bekalan elektrik di negara ini juga kian meningkat dan peningkatan ini sebahagian besar disebabkan oleh pembaziran tenaga elektrik, di mana lampu, kipas dan pendingin udara dipasang walaupun tidak diperlukan. Dan mengambil maklum bahawa isu ini adalah isu global tetapi dapat diselesaikan secara lokal di mana setiap orang mempunyai peranan untuk mengurangkan pembaziran tenaga elektrik dan sekali gus mengurangkan punca pencemaran dan pemanasan dunia. Maka dengan ini dewan hendaklah mengambil ketetapan untuk meminta Kerajaan menggubal satu dasar atau pun undang-undang bagi mendakwa dan menghukum mereka yang sengaja membazir tenaga elektrik. Ketetapan juga haruslah diambil untuk memastikan semua ketua Jabatan Kerajaan, Agensi Kerajaan dan syarikat berkaitan kerajaan bertanggungjawab untuk mengurangkan pembaziran tenaga elektrik ini dan dimuatkan sebagai salah satu daripada kriteria indeks petunjuk prestasi mereka."

**[ Kementerian Tenaga, Teknologi Hijau dan Air ]**

13. PR-022-U18573

**Datuk Dr. Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa kanak-kanak adalah permata negara. Dan mengambil maklum bahawa potensi permata negara haruslah digilap sejak awal-awal lagi, seawal peringkat prasekolah mengambil maklum bahawa seawal peringkat pra-sekolahlah permata negara ini harus ditanamkan dan dibudayakan dengan unsur-unsur dan prinsip rukun negara dan konsep 1 Malaysia. Dan mengambil maklum juga bahawa sebagai taman bimbingan pra-sekolah yang terbesar di seluruh negara, Tabika Kemas boleh memainkan peranan ini. Maka dengan ini Dewan hendaklah mengambil ketetapan untuk meminta pihak Tabika Kemas untuk memainkan peranan ini dengan lebih aktif lagi demi untuk melahirkan modal insan negara yang berkualiti, berilmu, sopan dan patriotik."

**[ Kementerian Kemajuan Luar Bandar dan Wilayah ]**

14. PR-022-U20149  
**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan strategi yang terpenting untuk melengkapkan negara ini terus menghadapi kemerosotan ekonomi dunia serta membolehkan negara ini mengambil kesempatan yang baik apabila ekonomi global mula pulih."

**[ Kementerian Kewangan ]**

15. PR-022-U20151  
**Dr. Tan Seng Giaw [ Kepong ]** akan mencadangkan:-

"Bahawa Dewan ini mendebatkan kaedah yang paling berkesan untuk mengatasi cabaran mungkin berlakunya pandemik selesema A H1N1 yang sedang melanda dunia. Dewan ini juga membincangkan jangkitan penyakit yang lain seperti meningitis, denggi dan leptospirosis."

**[ Kementerian Kesihatan ]**

16. PR-022-U19935  
**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk membenarkan siaran langsung sidang Dewan Rakyat melalui televisyen supaya rakyat boleh menonton ucapan para ahli berhormat dan proses Dewan Rakyat membuat keputusan terhadap dasar dan undang-undang."

**[Kementerian Penerangan, Komunikasi dan Kebudayaan ]**

17. PR-022-U19942  
**Puan Teresa Kok Suh Sim [ Seputeh ]** akan mencadangkan:-

"Bahawa dewan ini mengambil keputusan untuk memulihkan pilihan raya Kerajaan tempatan demi menjadikan perkhidmatan Kerajaan tempatan di Negara kita lebih berkesan di samping memulangkan hak kepada rakyat untuk memilih Datuk Bandar dan ahli Majlis Kerajaan Tempatan."

**[ Kementerian Perumahan dan Kerajaan Tempatan ]**

18. PR-022-U19947

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk mendesak Kerajaan untuk melaksanakan kempen kitar semula dan kempen pengurangan penggunaan plastik dengan lebih gigih demi memelihara kebersihan alam sekitar."

**[ Kementerian Perumahan dan Kerajaan Tempatan ]**

19. PR-022-U19953

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini mengambil keputusan untuk mengembalikan Akta Perkhidmatan Parlimen yang telah dimansuhkan pada tahun 1993 sebagai langkah untuk menjadikan Parlimen Malaysia sebagai Parlimen Dunia Pertama."

**[Perdana Menteri ]**

20. PR-022-U19956

**Puan Teresa Kok Suh Sim [ Seputeh ]** akan mencadangkan:-

"Bahawa Dewan ini menyokong cadangan Suruhanjaya DiRaja penambahbaikan perjalanan dan pengurusan PDRM dan YAB Perdana Menteri untuk menubuhkan Suruhanjaya Bebas dan Salah Laku Polis (IPCMC)"

**[Kementerian Dalam Negeri ]**

21. PR-022-U18678

**Datuk Eric Enchin Majimbun [ Sepanggar ]** akan mencadangkan:-

"Bahawa Dewan ini membincangkan dan menetapkan dengan seriusnya mengenai keraguan rakyat Malaysia di Sabah terhadap kedudukan kerakyatan orang-orang asing tanpa proses yang ditetapkan dalam undang-undang dan Perlembagaan Persekutuan yang hendaklah dikaji dan diputuskan."

**[Kementerian Dalam Negeri ]**

22. PR-022-U18679

**Datuk Eric Enchin Majimbun [ Sepanggar ]** akan mencadangkan:-

"Bahawa Dewan ini membahaskan dan menetapkan terhadap keraguan dalam Perlembagaan Persekutuan yang memperuntukkan bahawa apa-apa pindaan kepada Perkara 159 hendaklah tertakluk kepada Perkara 161E untuk menjamin perlindungan kedudukan Perlembagaan Sabah dan Sarawak dengan memperuntukkan bahawa persetujuan Tuan Yang Dipertua Negeri Sabah hendaklah diperolehi untuk pindaan kepada perlembagaan yang menyentuh Perjanjian 20 Perkara seperti:(a) Kewarganegaraan (b) Keanggotaan dan bidang kuasa Mahkamah Tinggi Sabah dan Sarawak(c) Perkara di bawah kuasa perundangan Badan Perundangan Negeri"

**[Perdana Menteri ]**

23. PR-022-U18680

**Datuk Eric Enchin Majimbun [ Sepanggar ]** akan mencadangkan:-

"Bahawa Dewan ini mempertimbangkan dengan seriusnya mengenai kadar kemiskinan yang melanda negeri Sabah. Apakah sebenarnya sebab-sebab kadar kemiskinan di negeri ini masih jauh ketinggalan jika dibandingkan dengan negeri-negeri di Semenanjung, contohnya pada tahun 2007 kadar kemiskinan di Kelantan 7.2% sedangkan Sabah 16%. Keprihatinan mengenai kedudukan kemiskinan di Sabah haruslah diberi tumpuan yang khusus demi untuk memartabatkan rakyat Malaysia mendapat layanan dan perhatian yang sama tanpa mengira suku kaum, kebudayaan dan agama."

**[Perdana Menteri ]**

24. PR-022-U18752

**Tuan Kulasegaran A/L Murugeson [ Ipoh Barat ]** akan mencadangkan:-

"Bahawa Dewan ini mendesak Kerajaan Persekutuan supaya mencari satu jalan untuk menyeragamkan segala undang-undang memeluk agama kerana keputusan Jemaah Menteri baru-baru ini langsung tidak efektif dan tidak dapat dikuatkuasakan."

**[Perdana Menteri ]**

25. PR-022-U18458

**Dr. Ramasamy a/l Palanisamy [ Batu Kawan ]** akan mencadangkan:-

"Bahawa Dewan ini meminta Kerajaan Malaysia untuk membawa resolusi mengecam dan memutuskan hubungan diplomatik dengan Kerajaan Sri Lanka di mesyuarat Pertubuhan Bangsa-Bangsa Bersatu di atas kezaliman Kerajaan tersebut dalam pembunuhan orang awam Tamil beramai-ramai di Utara-Timur Sri Lanka."

**[Kementerian Luar Negeri ]**

26. PR-022-U18462

**Dr. Ramasamy a/l Palanisamy [ Batu Kawan ]** akan mencadangkan:-

"Bahawa Dewan ini mengambil maklum iaitu Kerajaan Persekutuan tidak mengambil langkah-langkah yang wajar bagi memastikan penerapan lebih banyak calon-calon dari masyarakat India dalam sektor perkhidmatan awam. Dewan ini meminta Kerajaan Persekutuan untuk memberi perhatian dalam isu ini agar pengambilan kakitangan ke dalam sektor perkhidmatan awam mengimbangi kaum, jantina dan merit."

**[Perdana Menteri ]**

27. PR-022-U18464

**Dr. Ramasamy a/l Palanisamy [ Batu Kawan ]** akan mencadangkan:-

"Bahawa Dewan ini mengambil maklum iaitu kebanyakan Sekolah-Sekolah Tamil di Negara berada dalam keadaan yang serba kekurangan sehingga mendatangkan kesan negatif kepada para pelajar. Dewan ini meminta Kerajaan Persekutuan supaya memberi perhatian khusus terhadap pembinaan Sekolah-Sekolah Tamil yang baru dan menaik taraf Sekolah-Sekolah Tamil yang sedia ada di mana perkara ini akan menyediakan suasana pembelajaran yang selamat dan selesa kepada pelajar."

**[Kementerian Pelajaran ]**

28. PR-022-U20067

**Tuan Liew Chin Tong [ Bukit Bendera ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh MINDEF, mesti dibentangkan di Parlimen dan diaudit oleh Jabatan Audit Negara supaya dijadikan sebagai syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Jet Sukhoi dan Kapal Selam Scorpene telah menimbulkan banyak persepsi negatif terhadap negara."

**[ Kementerian Pertahanan ]**

29. PR-022-U20167

**Dr. Haji Dzulkefly bin Ahmad [ Kuala Selangor ]** akan mencadangkan:-

"Bahawa Dewan ini membuat ketetapan agar Kerajaan Pusat melalui Suruhanjaya Perkhidmatan Air Negara (SPAN) dan Menteri Tenaga, Teknologi Hijau dan Air menyegerakan proses penstrukturan semula air di seluruh negara agar pengurusan rawatan dan pengagihan air dikembalikan kepada pihak Kerajaan negeri bagi keefisyenan serta membela kepentingan rakyat dan pengguna, khususnya bagi negeri Selangor yang telah tergendala proses ini akibat sikap dingin pihak Kementerian dalam membuat keputusan yang wajar, tegas dan muktamad."

**[ Kementerian Tenaga, Teknologi Hijau dan Air ]**

30. PR-022-U20168

**Dr. Haji Dzulkefly bin Ahmad [ Kuala Selangor ]** akan mencadangkan:-

"Bahawa Dewan ini mengingatkan pihak Kabinet supaya jangan membuat keputusan secara tergesa-gesa dan perlu lebih berhati-hati dalam membuat keputusan khususnya dalam hal yang membawa implikasi pertentangan Mahkamah Sivil dan Syariah , contohnya dalam kes "agama bersama" atau "common" religion baru-baru ini, sebelum dirujuk pelbagai pihak seperti golongan pemimpin agama-agama termasuk para alim ulama, para pengamal perundangan sivil dan syariah, tokoh-tokoh akademik dan cendekiawan serta pemimpin masyarakat sivil, bagi memitigasi konflik pertentangan agama dan perundangan."

**[Perdana Menteri ]**

31. PR-022-U20169  
**Dr. Haji Dzulkefly bin Ahmad [ Kuala Selangor ]** akan mencadangkan:-
- "Bahawa Dewan ini segera membuat ketetapan bagi menangani kemelut pemberian Biasiswa Seberang Laut JPA yang setiap tahun berdepan dengan pelbagai pertikaian dengan cara menjadikan sistem penilaian itu satu yang jelas kriterianya (peratus input akademik dan ko-kurikulum) dan telus untuk semua dan dijadikan ia satu isu kategori biasiswa cemerlang untuk seberang laut" serta menetapkan bidang-bidangnya yang lebih menyeluruh bukan sahaja perubatan dan kejuruteraan, tetapi juga kewangan dan ekonomi serta syariat, falsafah dan selainnya bagi benar-benar melahirkan tokoh-tokoh hebat dalam bidang masing-masing. Dewan ini juga perlu menetapkan pelbagai lagi biasiswa lain sama ada yang belajar dalam atau luar negara bagi golongan pelajar lain."

**[Perdana Menteri ]**

32. PR-022-U19220  
**Tuan Gwo-Burne Loh [ Kelana Jaya ]** akan mencadangkan:-

"Bahawa Dewan ini mengambil maklum bahawa Kerajaan Malaysia sebagai anggota Majlis Hak Asasi Manusia Bangsa-Bangsa Bersatu dalam menguatkuasakan Resolusi 62/149 Bangsa-Bangsa Bersatu mengenai Moratorium terhadap hukuman mati yang telah dikuatkuasakan oleh Perhimpunan Agung Bangsa-Bangsa Bersatu pada 18 Disember 2007 di mana negara-negara yang masih mengamalkan hukuman mati diminta untuk menghentikan penggunaan hukuman mati dan mengurangkan jumlah hukuman-hukuman yang membawa hukuman mati secara berperingkat dan melaksanakan moratorium terhadap kesemua hukuman-hukuman mati dengan hasrat untuk menghapuskan hukuman ini sama sekali. Maka dengan ini Dewan hendaklah mengambil ketetapan untuk meminta Kerajaan melalui Kementerian Luar Negeri untuk membantu mematuhi Moratorium tersebut dan meminda undang-undang yang bercanggah dengan Moratorium tersebut."

**[Perdana Menteri ]**

33. PR-022-U19225  
**Tuan Gwo-Burne Loh [ Kelana Jaya ]** akan mencadangkan:-

"Bahawa Dewan ini menubuhkan sebuah Suruhanjaya Diraja Siasatan Kes Pembunuhan Altantuya Sharibu yang mati dibunuh beberapa tahun lalu. Daripada siasatan dan perbicaraan yang dijalankan, banyak pihak tidak berpuas hati dengan perjalanannya dan diharap agar suruhanjaya ini mampu untuk menjawab pelbagai spekulasi."

**[ Kementerian Dalam Negeri ]**

34. PR-022-U0188  
**Dato' Ngeh Koo Ham [Beruas]** akan mencadangkan:-

"**BAHAWASANYA** beberapa bulan yang terdekat ini, rakyat mendapati polis telah bertindak secara tidak bertanggungjawab, secara sewenang-wenangnya melanggar undang-undang dan pilih kasih (double standard) dalam tindakan-tindakan mereka.

Antara tindakan-tindakan mereka yang mempunyai unsur-unsur di atas adalah seperti berikut :-

1. Menghalang Ahli-ahli Dewan Undangan Negeri Perak daripada memasuki Dewan Undangan Negeri (DUN) Perak pada 3/3/2009.
2. Mematuhi arahan daripada Setiausaha DUN Perak dan Setiausaha Kerajaan Negeri Perak dan bukannya arahan daripada Speaker DUN Perak apabila menghalang ADUN-ADUN Perak daripada memasuki DUN Perak pada 3/3/2009.
3. Pada 29/3/2009, YB Ong Boon Piaw, ADUN dari DAP bagi kawasan DUN Tebing Tinggi, Perak telah ditangkap dan ditahan kerana mengeluarkan DVD rakaman perjalanan persidangan DUN Perak yang berlangsung pada 3/3/2009 tetapi YB Dato' Dr Mah Hang Soon ADUN dari MCA bagi kawasan Chenderiang, Perak tidak ditangkap atau ditahan apabila beliau mengeluarkan insiden persidangan DUN Perak yang berlaku pada 7/5/2009.
4. Pada 5/5/2009, aktivis dan ahli akademik, Wong Chin Huat telah ditangkap selepas menyeru rakyat Malaysia berpakaian hitam.
5. Pada 6/5/2009, 14 orang individu termasuk seorang ahli Parlimen ditangkap merana menunjukkan soladiriti bersama Wong Chin Huat di depan balai polis Brickfields, Kuala Lumpur.

6. Pada 7 Mei juga, 15 orang individu dan 5 peguam ditangkap kerana menunjukkan solidariti bersama Wong Chin Huat di depan balai polis Brickfields, Kuala Lumpur.
7. Pada 7/5/2009, 69 orang individu termasuk ahli-ahli Dewan Rakyat dan Dewan Undangan Negeri telah ditangkap dan ditahan semasa minum dan makan di restoran, sedang berjalan kaki atau pakai pakaian warna hitam di kawasan Ipoh, Perak. Kegiatan-kegiatan ini langsung tidak melanggar mana-mana peruntukan undang-undang.
8. Pihak polis mencero bohi DUN Perak pada 7/5/2009 dan secara paksa mengheret keluar YB V. Sivakumar, Speaker DUN Perak daripada DUN Perak dan mengurung beliau dalam sebuah bilik.
9. Sewenang-wenangnya tidak membenarkan rakaman insiden DUN Perak yang berlaku pada 7/5/2009 ditayangkan dalam Majlis Makan Malam DAP di Sitiawan, Perak pada 9/5/2009 dan secara ganas dan berkelakuan samseng memberhentikan jamuan makan malam tersebut dan merampas alat-alat audio video yang digunakan untuk tayangan rakaman tersebut tetapi apabila pihak MCA menayangkan insiden 7/5/2009 tersebut di jamuan Makan Malam MCA di Ipoh pada 17/5/2009 mereka dibenarkan berbuat demikian.
10. Pada 26/5/2009 jam lebih kurang 7.00 pagi, polis telah sewenang-wenangnya menangkap 5 orang pekerja yang sedang membuat persiapan memasang belon untuk pelancaran mogok lapar di bangunan DAP Perak dan alasan yang diberikan oleh Ketua Polis Negeri Perak ialah kerana perkataan 'Daulat Tuanku' atas belon tersebut merupakan satu kesalahan di bawah Akta Hasutan 1948.
11. Polis bertindak tidak membenarkan orang ramai secara aman berkumpul untuk mengadakan kempen memasang lilin untuk menunjuk solidariti dengan rakyat Perak. Mereka yang berbuat demikian di Kuching, Pulau Pinang, Seputeh & Ampang, Kuala Lumpur telah ditangkap dan ditahan oleh pihak Polis.
12. Pada 26/5/2009, polis tanpa asas yang kukuh dari segi undang-undang telah menangkap 21 orang termasuk seorang Ahli Dewan Rakyat, 7 ADUN Perak.
13. Kedaulatan undang-undang dicabuli oleh pihak polis dan ia seakan-akan tidak ada undang-undang lagi di Malaysia terutamanya negeri Perak.

14. Beberapa laporan polis telah dibuat terhadap tindakan-tindakan salah di atas yang dilakukan oleh pihak polis tetapi tidak ada tindakan yang diambil terhadap anggota-anggota polis yang bersalah.

**BAHAWASANYA** ramai rakyat sekarang mula memberi gelaran 'Polis, Raja di Malaysia' kepada pasukan polis dan pasukan polis tidak lagi digelar 'Polis DiRaja Malaysia' oleh mereka.

**BAHAWASANYA** setiap Ahli Dewan Rakyat telah berikrar untuk memelihara, melindungi serta mempertahankan Perlembagaan Malaysia. Tindakan-tindakan salah polis di atas telah melanggar Perkara-perkara 5 (kebebasan diri), 8 (sama rata), 9 (kebebasan bergerak) dan 10 (kebebasan bercakap, berhimpun dan persatuan) Perlembagaan Persekutuan.

**MAKA** untuk memulihkan kepercayaan orang ramai kepada institusi polis dan juga untuk memastikan keadaan yang tersebut di atas diperbetulkan dan tidak berlarutan, saya ingin mengusulkan Dewan yang mulia ini untuk membuat satu ketetapan bahawa Ketua Polis Negara, Tan Sri Musa bin Hassan dipecat dari jawatannya dengan serta-merta.

**[ Kementerian Dalam Negeri ]**

35. **Tuan Zulkifli Bin Noordin [Kulim Bandar Baru]** akan mencadangkan:-

"Bahawa dewan ini mengambil ketetapan agar Kerajaan Persekutuan mengambil langkah supaya Artikel 3 Perlembagaan Persekutuan dipinda dengan menambah perkataan seperti berikut (seperti yang dihitamkan).

'Islam adalah agama bagi persekutuan ***termasuk dari segi undang-undang dan syariatnya***'

**[Perdana Menteri]**

36. **Tuan Zulkifli Bin Noordin [Kulim Bandar Baru]** akan mencadangkan:-

"Bahawa Dewan ini mengambil ketetapan agar Kerajaan Persekutuan mengambil langkah supaya Artikel 4 Perlembagaan Persekutuan dipinda dengan menambah perkataan seperti berikut (seperti yang dihitamkan).

'Perlembagaan ini adalah undang-undang utama Persekutuan dan, ***kecuali undang-undang dan syariat Islam***, apa-apa undang-undang yang diluluskan berlawanan dengan ***Perlembagaan ini dan undang-undang Islam atau hukum syara'*** hendaklah terbatal setakat ianya berlawanan itu.'

**[Perdana Menteri]**

37. **Tuan Zulkifli Bin Noordin [Kulim Bandar Baru]** akan mencadangkan:-

"Bahawa Dewan ini mengambil ketetapan agar Kerajaan Persekutuan mengambil langkah supaya Artikel 11 (1) Perlembagaan Persekutuan dipinda dengan menambah perkataan seperti berikut (seperti yang dihitamkan)

***'Tiap-tiap orang adalah berhak menganuti dan mengamalkan ugamanya, termasuk menukar agamanya bagi penganut agama Islam yang hendaklah tertakluk kepada undang-undang dan syariat Islam. Bagi maksud penganut agama Islam, soal kemasukan dan kemurtadan dari agama Islam hendaklah ditentukan oleh Mahkamah Syariah yang mempunyai bidang kuasa mutlak ke atasnya'***

**[Perdana Menteri]**

38. **Tuan Zulkifli Bin Noordin [Kulim Bandar Baru]** akan mencadangkan:-

"Bahawa Dewan ini mengambil ketetapan agar Kerajaan mengambil langkah supaya Jadual 9 senarai 2 (1) Perlembagaan Persekutuan dipinda dengan membuang perkataan seperti berikut :-

'...tetapi tidak mempunyai bidangkuasa mengenai kesalahan-kesalahan kecuali setakat yang diberi oleh undang-undang persekutuan...' dan diganti dengan perkataan berikut ;

***'dan mempunyai bidangkuasa mengenai apa-apa jua kesalahan jenayah syarie dan lain-lain yang ditetapkan atau diperuntukkan di dalam hukum syara' dan undang-undang Islam termasuk membicarakan, memutuskan dan menghukum mana-mana orang Islam yang berkenaan menurut sabitan dan hukuman yang ditetapkan oleh hukum syara' dan undang-undang Islam'.***

Dan Akta Mahkamah Syariah (Bidang kuasa Jenayah) 1965 hendaklah dipinda bersesuaian dengan pindaan kepada Jadual 9 Senarai 2 (1) Perlembagaan Persekutuan seperti yang dinyatakan di atas”.

**[Perdana Menteri]**

39. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan agar Kerajaan Persekutuan menguatkuasakan keputusan Majlis Fatwa kebangsaan pada 08hb.Oktober 1987 dan mengambil langkah memansuh dan menghapuskan semua amalan dan upacara bertafakur yang diadakan di hadapan Tugu Negara dan semua langkah yang berkesan dan efektif diambil agar anggota tentera, polis dan lain-lain orang yang beragama Islam tidak dipaksa dan/ atau diarah melakukan upacara dan amalan kawad hormat dan/ atau bertafakur di hadapan Tugu Negara yang telah difatwakan sebagai syirik’.

40. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Kerajaan Persekutuan dengan kerjasama semua Kerajaan Negeri supaya melantik seorang Mufti Negara sebagai Ketua bagi dan dengan kuasa dan otoriti mengatasi kesemua Mufti-mufti dan menjadi Pengerusi bagi Majlis Fatwa Kebangsaan dan tanggungjawab dan menjawab hanya kepada Yang DiPertuan Agong dan Majlis Raja-Raja”.

41. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil langkah untuk menubuhkan sebuah jawatankuasa caucus khusus untuk menangani dan memantau dan mengambil langkah-langkah berkaitan dengan masalah Palestin dan menamakan badan ini sebagai ‘**Jawatankuasa Caucus bagi Palestin**’ dengan melantik YB Kepala Batas sebagai Pengerusi Caucus tersebut”.

42. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil langkah untuk menubuhkan sebuah jawatankuasa Caucus khusus untuk menangani dan memantau dan mengambil langkah-langkah berkaitan dengan hal ehwal Islam dalam negara ini dengan tujuan untuk memartabatkan, memperkukuhkan dan mempertahankan hal ehwal Islam dan menamakan badan ini sebagai **‘Jawatankuasa Caucus bagi Hal Ehwal Islam’** dengan melantik YB Kepala Batas sebagai Pengerusi Caucus tersebut”.

**[Perdana Menteri]**

43. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil langkah untuk menubuhkan sebuah Jawatankuasa Caucus untuk menangani dan memantau dan mengambil langkah-langkah berkaitan dengan hal ehwal masyarakat India dengan tujuan untuk memantapkan kedudukan ekonomi mereka dan menyelesaikan permasalahan kewarganegaraan dan kad pengenalan mereka dan dinamakan sebagai **Jawatankuasa Caucus bagi Hal Ehwal Masyarakat India**”.

**[Perdana Menteri]**

44. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Kementerian Pelajaran supaya dengan serta-merta memansuhkan pengajian mata pelajaran Sains & Matematik dalam Bahasa Inggeris dan menggantikan ia dengan menggunakan Bahasa Melayu sebagai bahasa pengajian mata pelajaran tersebut”.

**[Kementerian Pelajaran]**

45. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Kerajaan Persekutuan supaya mengambil langkah menyiarkan dan mewajibkan siaran azan pada tiap-tiap waktu solat fardu yang lima di kesemua tempat awam tanpa sebarang sekatan dan/ atau halangan’.

**[Kementerian Penerangan, Komunikasi dan Kebudayaan]**

46. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Menteri Dalam Negeri mengambil langkah supaya kesemua banduan dan tahanan yang disabit dan dikenakan hukuman penjara sepanjang hayat hendaklah dikurangkan hukuman penjara tidak melebihi 20 (dua puluh tahun) dan bagi yang telah menjalani hukuman melebihi jumlah 20 tahun tersebut (setelah ditolak cuti dan kelakuan baik) hendaklah dibebaskan dengan serta-merta”.

**[Kementerian Dalam Negeri]**

47. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini menganbil langkah mendesak Menteri Pengangkutan supaya mengarahkan dan/ atau mengenakan syarat kepada syarikat penerbangan Malaysia Airline, Air Asia atau mana-mana syarikat penerbangan dalam negeri ini supaya membenarkan kakitangan wanitanya terutamanya pramugari memakai pakaian / uniform yang mematuhi hukum syara’ sebagaimana syarikat penerbangan antarabangsa lain seperti Emirates Airways, Saudi Airlines, Royal Brunei Airline dan lain-lain”.

**[Kementerian Pengangkutan]**

48. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Menteri Pengangkutan melarang dan/ atau mengenakan syarat kepada syarikat Penerbangan Malaysia supaya menghentikan penjualan arak dan lain-lain minuman keras dan yang memabukkan semasa di dalam penerbangan sebagaimana yang telah pun dilaksanakan oleh banyak syarikat penerbangan antarabangsa lain seperti Saudi Air, Emirate Airways, Brunei Airline dan lain-lain.

**[Kementerian Pengangkutan]**

49. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Menteri Perdagangan Dalam Negeri dan Hal Ehwal Pengguna melarang dan/ atau mengenakan syarat kepada syarikat perniagaan runcit Seven-Eleven (7-11) dilarang sama sekali daripada menjual arak dan/atau apa-apa minuman keras dan yang memabukkan serta sebarang bentuk kondom dipremisnya”.

**[Kementerian Perdagangan Dalam Negeri dan Hal Ehwal Pengguna]**

50. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mendesak Menteri Dalam Negeri supaya dengan segera mengambil langkah membebaskan semua tahanan Akta Keselamatan Dalam Negeri yang ditahan kononnya atas dakwaan terlibat dalam kegiatan militant Islam seperti Kumpulan Mujahidin Malaysia (KMM), Jemaah Islam Malaysia (JI), Kumpulan Al Maunah dan lain-lain termasuk Mas Selamat dan jika pihak keselamatan mempunyai apa-apa bukti dan keterangan terhadap mereka hendaklah mereka dengan segera dibawa ke hadapan sebuah Mahkamah yang berbidang kuasa untuk membicarakan mereka tanpa sebarang kelengahan lagi”.

**[Kementerian Dalam Negeri]**

51. **Tuan Zulkifli Bin Noordin [Kulim Bandar Baru]** akan mencadangkan:-

“Bahawa Dewan ini mengambil ketetapan mencadangkan kepada Menteri di Jabatan Perdana Menteri supaya mengkaji dan melaksanakan projek membesarkan dan membaik pulih Masjid Jame' Bandar Raya Kuala Lumpur termasuk membina mihrab dan mimbar baru yang bersesuaian, menurap keseluruhan tapak masjid tersebut dengan marmar sebagaimana yang dibuat di Masjidil Haram dan Masjid Nabawi serta memperkukuhkan bumbung Masjid tersebut agar dapat menampung jemaah untuk mengerjakan Solat terutamanya solat Jumaat dan kedua Eidulfitri & Eiduladha memandangkan pertambahan jemaah yang semakin meningkat mutakhir ini”.

**[Perdana Menteri]**

52. PR-022-U18752

**Tuan Zulkifli Bin Noordin (Kulim Bandar Bharu)** akan mencadangkan:-

"Bahawa Dewan ini mengambil ketetapan mencadangkan kepada Menteri di Jabatan Perdana Menteri supaya membatalkan dan/atau menarik balik arahan supaya kes-kes penceraian pasangan bukan Islam yang salah seorang dari mereka memilih untuk memeluk Islam dibicarakan di Mahkamah sivil; atau kes-kes anak-anak bawah umur yang di Islamkan oleh ibu, bapa atau penjaga mereka (yang asalnya bukan Islam) yang kemudiannya memilih memeluk Islam dibicarakan di Mahkamah sivil. Bahawa Dewan ini juga mengambil ketetapan mencadangkan kepada Menteri di Jabatan Perdana Menteri supaya membatalkan dan / atau menarik balik arahan supaya dasar "common religion" (dengan izin) yang hendak diterima pakai bagi kes-kes kanak-kanak di bawah umur 18 tahun dimana semua kanak-kanak dibawah 18 tahun dianggap menganut agama ibu-bapanya semasa dilahirkan sedangkan dasar "common religion" ini bercanggah dengan hukum syara' dan perundangan negara seperti berikut:

- i. kerana secara langsung menyebabkan ibu, bapa atau penjaga (yang bukan Islam) dan memilih untuk memeluk Islam akan kehilangan hak penjagaan anak tersebut; sekaligus membantutkan usaha da'wah Islam kerana bukan Islam akan menjadi ragu-ragu untuk memeluk Islam kerana khuatir kehilangan anak;
- ii. dalam keadaan kedua ibu-bapa kanak-kanak (yang asalnya bukan Islam) memilih untuk memeluk Islam maka dasar "common religion" tersebut akan menyebabkan kanak-kanak itu kekal dalam agama asal ibu bapanya dan oleh itu mendedahkan kanak-kanak itu menjadi perebutan untuk penjagaan oleh mana-mana pihak ketiga yang bukan Islam;
- iii. sedangkan hukum syara' menetapkan bahawa dalam keadaan mana-mana salah seorang ibu-bapanya memeluk Islam maka kanak-kanak dibawah umur aqil baligh itu hendaklah dianggap Islam.
- iv. Dalam kes *Nedunchelian v. Nur Safiqah* [2005] 2 AMR 711, Mahkamah Tinggi sivil telah memutuskan bahawa menurut hokum syara' berdasarkan fahaman mazhab syafi'e (yang dianuti majority umat Islam di Malaysia) bahawa apabila salah seorang ibu atau bapa seseorang kanak-kanak itu memeluk agama Islam, maka secara automatik anak-anak itu juga dianggap Islam, tanpa perlu kepada formaliti atau persijilan pemelukan kepada agama Islam.

- v. Mahkamah Rayuan didalam kes Subashini [2007] 2 AMR 540 telah memutuskan bahawa isu ini tertakluk kepada Artikel 12 (4) Perlembagaan Persekutuan yang memperuntukkan bahawa “agama bagi seseorang yang berumur kurang daripada 18 tahun adalah ditetapkan oleh ibu bapa atau penjaganya” dan Mahkamah Rayuan menafsirkan bahawa hak menentukan agama seseorang kanak-kanak bergantung kepada mana-mana salah seorang daripada mereka iaitu ibu, bapa atau penjaga. Bermakna salah seorang daripada mereka berhak untuk menentukan agama yang boleh di anuti oleh anak-anak mereka.
- vi. Keputusan Mahkamah Rayuan ini bersesuaian dengan keputusan Mahkamah Persekutuan didalam kes Teoh Eng Huat v. MAIK [1990] MLJ 300.
- vii. Bahawa dasar “common religion” ini hanya berteraskan kepada anggapan bahawa kanak-kanak itu dianggap menganut agama ibu-bapanya semasa dilahirkan, dan tanggapan itu termansuh dengan sendirinya apabila kanak-kanak itu mencapai umur 18 tahun di mana di waktu itu sebagai seseorang yang sudah cukup umur kanak-kanak itu mempunyai hak untuk menentukan agama pilihannya. Sudah tentu dasar seperti ini bercanggah dengan hukum syara’ kerana seseorang kanak-kanak Muslim itu dianggap kekal Muslim apabila mencapai umur aqil baligh melainkan diisytiharkan murtad oleh mana-mana Hakim syarie yang melaksanakan undang-undang Islam.
- viii. Dasar ini juga akan menyebabkan pasangan yang memeluk Islam itu terikat kepada sistem perundangan yang bukan Islam dan ini bercanggah sama sekali dengan hukun syara dan juga Artikel 11 Perlembagaan Persekutuan yang menjamin dan kebebasan mana-mana warganegara menganut dan mengamal agama pilihannya, bermakna apabila beliau memilih Islam maka beliau berhak untuk dibicarakan di Mahkamah Syariah menurut undang-undang munakahat Islam;
- ix. Dasar yang diputuskan oleh kabinet termasuk mengarahkan kes-kes seumpama di atas dibicarakan di Mahkamah Sivil dan melaksanakan dasar “common religion” akan menyebabkan kepada percanggahan dengan hukun syara, bercanggah dengan Artikel 11, Artikel 12, Artikel 121 (1A) Perlembagaan Persekutuan dan bercanggah dengan keputusan-keputusan yang dibuat oleh Mahkamah Persekutuan dan lain-lain.

**(Perdana Menteri)**

**UCAPAN-UCAPAN PENANGGUHAN**

<b>TARIKH UCAPAN DIBUAT</b>	<b>AHLI YANG BERUCAP</b>	<b>TAJUK UCAPAN</b>	<b>MENTERI YANG BERTANGGUNGJAWAB</b>
1. 18.6.2009 (Khamis)	1. Tuan Jeff Ooi (Jelutong)	1. Broadband PASCA 2010.	1. Menteri Penerangan, Komunikasi dan Kebudayaan
2. 18.6.2009 (Khamis)	2. Tuan Er Teck Hwa (Bakri)	2. Struktur kualiti pembinaan laluan pintas Muar.	2. Menteri Kerja Raya